

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

Tangazo la Serikali Na. 372 la Tarehe 03/10/2014

SHERIA YA SERIKALI ZA MITAA (MAMLAKA ZA WILAYA)

(SURA 287)

SHERIA NDOGO

(Zimetungwa chini ya kifungu cha 153(1))

**SHERIA NDOGO ZA (HIFADHI YA MAZINGIRA) ZA HALMASHAURI YA
WILAYA YA ROMBO ZA MWAKA 2014**

- | | |
|----------------------------|---|
| Jina na mwanzo wa kutumika | 1. Sheria Ndogo hizi zitajulikana kama Sheria Ndogo za (Hifadhi ya Mazingira) za Halmashauri ya Wilaya ya Rombo, za Mwaka 2014 na zitaanza kutumika baada ya kutangazwa kwenye Gazeti la Serikali |
| Eneo la matumizi | 2. Sheria Ndogo hizi zitatumika katika eneo lote lililo chini ya mamlaka ya Halmashauri ya Wilaya ya Rombo. |
| Tafsiri | 3. Katika Sheria Ndogo hizi isipokuwa itakapoelezwa vinginevyo:

“Afisa mwidhinishwa” maana yake ni Afisa Maliasili, Afisa Kilimo na Mifugo na Afisa yeyote wa Halmashauri atakayeteuliwa kusimamia utekelezaji wa Sheria Ndogo hizi;

“Eneo la Hifadhi” ni maeneo ya milima, maeneo ya vyanzo vya maji, hifadhi ya misitu, miteremko na maeneo mengine ambayo yatatangazwa na Halmashauri kuwa ni maeneo ya hifadhi;

“Halmashauri” maana yake ni Halmashauri ya Wilaya ya Rombo.

“Hifadhi ya Mazingira” maana yake ni utunzaji endelevu wa ardhi, mimea, hewa, viumbe hai na visivyo hai na vyanzo vya maji vinavyozingatia masharti na maelekezo yatakayotolewa na Afisa mwidhiniwa chini ya Sheria Ndogo hizi au Sheria nyingine yeyote;

“Kiwanda” maana yake ni jengo au kundi la majengo au eneo ambapo vitu vinatengenezwa;

“Kuvuna misitu” maana yake ni pamoja na kufyeka, kukata au kung’oa miti, visiki; |

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

“Maeneo ya malisho” maana yake ni pamoja na sehemu zote ambazo zimetengwa na Halmashauri;

“Maji” kama ilivyotafsiriwa katika Sheria ya usimamizi Mazingira Na. 20 ya mwaka 2004 ni pamoja na maji ya kunywa, ya mito, vijito, maji yanayotiririka, yaliyohifadhiwa, yaliyo katika visima, mabwawa, mifereji, madimbwi, maziwa, maji yaliyoko chini ya ardhi na maji yaliyoko katika mkondo.

“Mazao ya misitu” maana yake kama ilivyotafsiriwa katika Sheria ya Misitu Na. 14 ya mwaka 2002 chini ya kifungu Na, 2 ni kitu chochote kinachopatikana au kuzalishwa kutokana na miti, mazao yanayoota au kupatikana msituni, ambayo ni pamoja na mianzi, magamba, mkaa, kuni, miti, fito, mbao, mbegu za miti, nta, asali, utaa, matunda, upapi, majani ya kulalia wanyama, majani, mizizi, gundi, utomvu, maranda matete, kamba, makuti mawale), nyuzi za wanyama, mimea (miti) na kitu chochote chenye uhai au kisicho na uhai kitakachotangazwa katika gazeti la Serikali kuwa ni zao la msitu.

“Mazingira” kama ilivyotafsiriwa katika sheria ya usimamizi wa mazingira na.20 ya mwaka 2004 yanahusisha maumbile halisi ya wazungukao Binadamu ikiwa ni pamoja na hewa, ardhi, maji, tabia ya nchi, sauti, mwanga, harufu, ladha, viumbe hali za kibiojolojia za wanyama na mimea. rasilimali za kitamaduni na masuala ya uchumi jamii na inahusisha mazingira asilia na yaliyoundwa binadamu na jinsi yanavyoingiliana.

“Mfugaji” maana yake ni mtu yeyote anayejishughulisha na ufugaji mifugo katika eneo la Halimashauri

“Mkurugenzi” maana yake ni Mkurugenzi mtendaji wa Halimashauri ya wilaya ya Rombo na ni pamoja na Afisa yeyote wa umma atakayeteuliwa kutekeleza majukumu ya Mkurugenzi;

“Mifugo” maana yake ni mnyama yeyote anayefugwa na binadamu;

“Misitu” maana yake ni eneo la ardhi ambalo limefunikwa angalau kwa asilimia 10 ya miti, uoto wa asilia au iliyopandwa, au asilimia 50 au zaidi, ya vichaka na miti inayoota upya ambayo itajumuisha aina yote ya misitu ya hifahi ambayo itatangazwa chini ya sheria ya misitu Na. 14 ya mwaka 2002 na mazao yote ya misitu ikijumuisha majani na nyasi ndani ya eneo la Halmashauri;

“Uchafu hatari” kama ilivyotafsiriwa katika sheria ya usimamizi wa

mazingira ya mwaka 2004. Maana yake ni kitu chochote kigumu, chenye majimaji, gesi au taka zitokazo viwandani, au mafuta machafu, ambayo yanaleta athari za kikemia, kwa binadamu, au mazingira;

“Uchafuzi wa Mazingira” kama ilivyo katika sheria ya usimamizi wa mazingira Na.20 ya mwaka 2004 ni mabadiliko ya hali ya hewa ya moja kwa moja au yasiyo ya moja kwa moja, joto, kemikali, biolojia, au zana za mionzi katika mazingira ambayo zana hizo zinafanyia kazi au kutoa harufu mbaya, mrundikano wa taka ambazo unaathiri watumiaji, au unaosababisha hali hatari kwa afya ya jamii, usalama, au ustawi, au hatari kwa wanyama, ndege, wanyama pori, samaki, au viumbe vyote vya baharini, mimea au kusababisha hali mbaya ya hewa, upungufu au kizuizi ambacho ni sehemu katika sheria hizi;

“Udongo” kama ilivyo katika sheria ya usimamizi wa Mazingira ya mwaka 2004 maana yake ni pamoja na dunia, mchanga, miamba, miamba tope, madini, uoto wa mimea, mimea na wanyama iliyoko chini ya udongo pamoja na vumbi;

“Vitu hatari” maana yake kama ilivyotafsiriwa katika sheria ya usimamizi wa mazingira ya mwaka 2004, ni kemikali yoyote, taka gesi, madawa, vidonge, mimea wanyama au viumbe hai visivyoonekana ambavyo ni hatari kwa afya ya binadamu, maisha au mazingira;

“Waziri” maana yake ni waziri mwenye dhamana ya serikari za mitaa.

SEHEMU YA PILI

MASHARTI YA UFUGAJI

Wajibu wa mfugaji

4. Kila mfugaji chini ya Sheria Ndogo hizi-

(a) atatakiwa kufuga idadi ya mifugo kama itakavyoainishwa katika kibali chake kitakachomruhusu kufuga kwa kuzingatia ukubwa wa eneo na kuridhika kwamba ufugaji huo hautakuwa kero kwa majirani.

(b) atatakiwa kufuga ndani ya eneo lake (zero grazing) bila ya kuleta usumbufu kwa jirani zake na jamii kwa ujumla na

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

kuhakikisha sehemu ya kufugia wanyama hao inakuwa safi wakati wote na ana chombo cha kuhifadhi samadi inayotokana na mifugo hiyo.

- (c) anayeishi pembezoni mwa Mji atatakiwa kupitisha mifugo yao katika njia zilizopangwa na kuidhinishwa na Halmashauri
- (d) atatakiwa kuwa na kadi ya mifugo itakayoonyesha idadi na aina ya mifugo aliyonayo;
- (e) atatakiwa kupeleka mifugo katika majosho kama atakavyoagizwa na Halmashauri;
- (f) atatakiwa kupeleka mifugo yake katika vituo vya chanjo kama itakavyoamuriwa na Halmashauri na atalipia chanjo hiyo kama atatakiwa kufanya hivyo;

Masharti ya
mfugaji

5. Ni marufuku kwa mfugaji yeyote

- (a) kuchunga, kulisha na kunywesha maji mifugo katika maeneo ya mipango miji pamoja na maeneo yote ambayo hayakutengwa kwa ajili hiyo;
- (b) kusafirisha mifugo kwa kuiswaga barabarani;
- (c) kusafirisha au kuhamisha mifugo kutoka eneo moja hadi jingine bila kibali kutoka kwa Halmashauri;
- (d) kuuza au kununua mifugo katika maeneo ambayo siyo mnada, masoko au magulio ya mifugo yaliyoidhinishwa na Halmashauri;
- (e) kufuga mifugo mingi katika eneo dogo la Halmashauri
- (f) Ni marufuku kwa mfugaji yeyote kupitisha mifugo katika maeneo ambayo hayakuidhinishwa na Halmashauri kupitisha mifugo;

Kudhibiti
mifugo
inayodhurur
a ovyo

6. -(1) Itakuwa halali kwa Afisa Kilimo na Mifugo, Maafisa Watendaji wa Kata na Vijiji, na Afisa yeyote wa Halmashauri atakayeteuliwa kusimamia utekelezaji wa Sheria Ndogo hizi kuingia katika nyumba au jengo lolote wakati wowote kwa madhumuni ya kukagua na kuhesabu idadi ya mifugo iliyomo katika nyumba hiyo..

(2) Mtu yeyote atakayemzuia Afisa Muidhiniwa kutekeleza

wajibu wake chini ya Sheria Ndogo hizi atakuwa ametenda kosa.

(3) Ni wajibu wa Halmashauri kutenga maeneo maalum kwa ajili ya shughuli za malisho kwa kuzingatia idadi ya mifugo ndani ya eneo la Halmashauri na kwa mujibu wa Sheria ya Ardhi Sura ya 113 na 114 pamoja na Sheria ya usimamizi wa Mazingira Na. 20 ya mwaka 2004.

(4) Halmashauri itatenga njia maalum ya kupitisha mifugo kwenda na kurudi malishoni au minadani.

(5) Halmashauri itafanya sensa ya mifugo na kutoa kadi ya mifugo na elimu ya ufugaji bora kwa jamii

Ukaguzi wa
mifugo

7. -(1)Itakuwa halali kwa Afisa Kilimo na Mifugo, Maafisa Watendaji wa Kata na Vijiji, na Afisa yeyote wa Halmashauri atakayeteuliwa kusimamia utekelezaji wa Sheria Ndogo hizi kuingia katika nyumba au jengo lolote wakati wowote kwa madhumuni ya kukagua na kuhesabu idadi ya mifugo iliyomo katika nyumba hiyo..

(2)Mtu yeyote atakayemzuia Afisa Muidhiniwa kutekeleza wajibu wake chini ya Sheria Ndogo hizi atakuwa ametenda kosa.

Wajibu wa
Halmashauri

8. -(1)Ni wajibu wa Halmashauri kutenga maeneo maalum kwa ajili ya shughuli za malisho kwa kuzingatia idadi ya mifugo ndani ya eneo la Halmashauri na kwa mujibu wa Sheria ya Ardhi Sura ya 113 na 114 pamoja na Sheria ya usimamizi wa Mazingira Na. 20 ya mwaka 2004.

(2)Halmashauri itatenga njia maalum ya kupitisha mifugo kwenda na kurudi malishoni au minadani.

(3)Halmashauri itafanya sensa ya mifugo na kutoa kadi ya mifugo na elimu ya ufugaji bora kwa jamii

Taratibu za
ufugaji

9. (1)Wafugaji wote watatakiwa kuzingatia masharti ya kufuga kama yalivyo katika Sheria Ndogo hizi au Sheria yoyote iliyotungwa na Bunge la Jamhuri ya Muungano wa Tanzania.

(2)Kila mfugaji atatakiwa kupeleka mfugo au mifugo yake machinjioni au mahali huduma hiyo inapopatikana na itakuwa ni marufuku kwa mtu yeyote kuchinjia nyama mahali pengine popote.

(3)Ni marufuku kwa mtu yeyote kununua, kuuza au kufanya biashara ya kubadilishana aina yoyote ya mifugo katika eneo lolote la Halmashauri isipokuwa kwenye minada ya magulio yaliyotengwa kwa

shughuli hiyo.

SEHEMU YA TATU

KILIMO NA HIFADHI YA ARDHI

Taratibu za
kilimo

10.-(1) Mtu atakayetaka kuendesha shughuli za kilimo katika Halmashauri atatakiwa kuzingatia taratibu za kilimo kama zitakavyotolewa na Halmashauri kwa kuzingatia sheria ya Ardhi sura ya 113 na 114 na Sheria nyingine zitakazotungwa na Bunge.

(2) Itakuwa halali kwa Afisa Kilimo kuingia katika shamba lolote kwa madhumuni ya kufanya ukaguzi na kuhakikisha utekelezaji wa Sheria Ndogo hizi.

Masharti
kwa
mkulima

11.-(1) Ni marufuku kwa mtu yeyote kulima katika miteremko, karibu na vyanzo vya maji, kandokando ya mito, mabwawa na maziwa au kufanya jambo lolote litakaloharibu hifadhi ya mazingira bila kuzingatia ushauri wa Afisa Kilimo. Michango ya jamii.

(2) Ni marufuku kwa mtu yeyote kutumia kinyume ardhi iliyotengwa kwa matumizi ya kilimo kama ilivyopangwa na kuidhinishwa na Halmashauri.

(3) Ni marufuku kwa mtu yeyote kusafisha shamba kwa ajili ya kilimo kwa njia ya kuchoma moto isipokuwa kwa kibali maalum kutoka kwa Halmashauri.

(4) Kibali kitakachotolewa chini ya Sheria Ndogo hizi kitakuwa cha maandishi na kitaonyesha jina la mwenye kibali, tarehe na eneo analotaka kuchoma moto.

(5) Muda unaotakiwa kuchoma moto chini ya Sheria Ndogo hizi ni kuanzia saa 12:00 asubuhi hadi saa 4:00 asubuhi.

(6) Ni wajibu wa Halmashauri kusimamia shughuli za kilimo na kuhakikisha kuwa wanazuia kilimo cha kuhamahama na kuhimiza kilimo cha mzunguko (crops rotation).

Uhifadhi wa
uoto wa
asili

12. Ni wajibu wa wakazi wa eneo ambalo uoto wa asili au mazingira ya eneo husika yameharibiwa, kuhakikisha kuwa wanalirudisha katika hali yake ya kawaida kwa kupanda miti au

Tangazo la Serikali Na. 372 (linaendelea)

kutoendelea kuharibu mazingira na kuwezesha uoto urudi katika hali yake.

Uchimbaji
mchanga na
kokoto

13. Ni marufuku kwa mtu yeyote kuchimba mchanga katika maeneo yasiyoruhusiwa na Halmashauri kama vile katika maeneo ya makazi ya watu, maeneo yaliyohifadhiwa kando kando ya barabara, mito au ndani ya mto, bwawa au ziwa katikati ya barabara.

14. Ni marufuku kwa mtu yeyote kujenga nyumba au jengo lolote katika eneo la hifadhi.

SEHEMU YA NNE

HIFADHI YA VYANZO VYA MAJI

Wajibu wa
kulinda
vyanzo vya
maji

15.-(1) Halmashauri itawajibika kuanzisha, kusimamia na kulinda vyanzo vya maji.

(2) Maeneo yaliyotajwa katika Jedwali la Sheria Ndogo hizi yamehifadhiwa

(3) Halmashauri itachukua hatua kali za kisheria dhidi ya mtu yeyote atakayeharibu chanzo cha maji au kushindwa kushiriki katika shughuli za kuhifadhi vyanzo vya maji bila sababu ya msingi.

Kulinda
eneo la
hifadhi

16.-(1) Ni marufuku wa mtu yeyote kulima, kukata miti, kufuga mifugo katika umbali wa mita 60 toka vyanzo vya maji au kufanya jambo lolote linaloharibu kwa namna yoyote chanzo cha maji na hifadhi ya mazingira.

(2) Itakuwa ni wajibu wa Halmashauri kupanda miti isiyonyonya maji katika vyanzo vya maji kwa kuzingatia maelekezo ya Afisa Misitu.

(3) Ni marufuku kwa mtu yeyote kumiliki eneo la chanzo cha maji isipokuwa Halmashauri.

Uchafuzi
wa vyanzo
vya maji

17.-(1) Ni marufuku mtu yeyote, kiwanda, taasisi, shirika kuelekeza mabomba ya maji machafu kwenye mito, mabwawa, ziwa, visima, mifereji, chemichemi au sehemu yoyote ambayo ni chanzo cha maji kwa ajili ya matumizi ya binadamu na wanyama au viumbe vingine vilivyo hai.

(2) Ni marufuku mtu yeyote kuweka kituo chochote chenye sumu ndani ya maji ambayo yanatumiwa na binadamu au kiumbe

chochote hai.

**SEHEMU YA TANO
HIFADHI YA MISITU**

Kuchoma au kusababisha moto **18.**-(1)Ni marufuku kwa mtu yeyote kuchoma misitu kwa namna yoyote ile katika misitu iliyoko eneo la Halmashauri

(2)Iwapo moto utatokea katika eneo la Halmashauri, kiongozi wa eneo husika atawajibika kutoa ishara ya hatari kwa kutumia njia iliyozoeleka kuamuru wakazi wa eneo hilo kwenda kuzima moto huo unapoonekana kuwa na madhara kwa maisha, mali za watu na uharibifu wa mazingira katika eneo hilo.

(3)Kila mkazi wa eneo hilo atawajibika kushiriki katika zoezi la kuzima moto huo endapo atatakiwa kufanya hivyo, kama atashindwa kushiriki katika kuzima moto bila sababu ya msingi atakuwa ametenda kosa.

Kibali cha kuchoma moto **19.**Mtu yeyote aliyepata kibali cha kuchoma moto atalazimika kutoa taarifa ya siku saba (7) kabla ya kuchoma moto kwa majirani walioko katika eneo analotaka kuchoma na ataweka njia za kuzuia moto.

Ukataji miti **20.**-(1)Ni marufuku kwa mtu yeyote kukata miti katika maeneo ya misitu iliyohifadhiwa kwa ajili ya matumizi ya aina yoyote bila kupata kibali kutoka Halmashauri.

(2)Halmashauri itatakiwa kuhakiki kama miti inayovunwa imekomaa na inafaa kwa ajili ya matumizi.

(3)Ni marufuku kwa mtu yeyote kuvuna miti katika msitu ambao umehifadhiwa kwa ajili ya viumbe maalum ambao ni rasilimali kwa Taifa.

(4) Watu wanao vuna miti kwa ajili ya kuchoma mkaa watatakiwa kuwa na eneo maalum lililoidhinishwa na Halmashauri kwa ajili ya kuchoma mkaa.

Wajibu wa kupanda miti **21.** Kila mkazi wa Halmashauri atawajibika-

(a) kupanda na kutunza miti katika eneo lake

(b) kupanda na kutunza miti katika shamba au mashamba

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

anayomiliki.

Wajibu wa
Halmashauri
iKijiji

22. Kwa mujibu wa Sheria Ndogo hizi kila kijiji-

- (a) kitawajibika kutenga eneo la hifadhi ya misitu wa asili kwa ajili ya matumizi ya baadae;
- (b) kitalazimika kutunza miti yote inayopandwa katika eneo la kijiji;
- (c) kitahakikisha ya kuwa kila kaya inapanda miti isiyopungua kumi kwenye eneo la nyumba yake;
- (d) mtu yeyote anayetaka kukata miti au mti wa matumizi yakuchonga vifaa, kujenga nyumba, kutengeneza zizi na shughuli nyinginezo, inabidi apate kibali cha maandishi toka kwa mwenyekiti wa kijiji, mtendaji wa kijiji na kibali cha Afisa Maliasili wa wilaya au wasaidizi wake kwa miti iliyopanda na kuhifadhiwa na Halmashauri ya wilaya;
- (e) kinapaswa kutenga na kupanda shamba la miti ekari 2 kila mwaka na kulitunza;
- (f) kila shule au taasisi nyingineyo wilayani itapaswa kupanda miti ya kuinga upepo kuzunguka majengo yake na kuwa na shamba lisilopungua miti hekta2;
- (g) Kijiji kitapaswa kutunza na kuhifadhi miti na nyasi kwenye milima, makorongo na vyanzo vya maji ili kuzuia mmomonyoko wa udongo;

- (h) Kijiji kitahakikisha kuwa kila anayeandaa shamba kwa ajili ya kilimo hatumii moto na anapanda miti kwenye mipaka ya shamba lake kama kinga upepo;
- (i) Kila mtu mwenye nyumba kwenye mji mdogo atawajibika kupanda miti kando ya barabara inayopita mbele ya nyumba yake na kuitunza;
- (j) Kila Mwenyekiti wa kitongoji, Mtendaji wa kijiji, Mkuu wa taasisi yoyote Wilayani atahakikisha kuwa kijiji au taasisi ina msitu wa hifadhi wa miti ya kupandwa au ya asili iliyotengwa kwa madhumuni ya kuhifadhi ardhi, mazingira na matumizi ya baadaye.

SEHEMU YA SITA TAKA NGUMU NA LAINI

Utupaji wa
taka ngumu
na laini

23.-(1)Ni wajibu wa Halmashauri kutenga eneo kwa ajili ya kutupa taka ngumu na laini na kusimamia kwa karibu usafi katika eneo hilo.

(2)Mtu yeyote atakayetupa ovyo taka ngumu au laini au kujisaidia katika kingo za mito au mabwawa au kwenye vyanzo vya maji vilivyoko katika Halmashauri yeyote atakuwa ametenda kosa.

Uendeshaji
wa viwanda

24.Ni marufuku kuendesha shughuli za karakana, mashine ya kusaga, kuranda mbao, kukamua maji ya matunda , kuchomelea vyuma au kuendesha shughuli yoyote inayozalisha uchafu ambao unaleta athari kwa binadamu na viumbe wengime katika maeneo ya makazi ya watu bila kuzingatia taratibu za Ujenzi

SEHEMU YA SABA

MAKOSA NA ADHABU

Makosa na
adhabu

25.Mtu yeyote atakuwa ametenda kosa ikiwa-

- (a) Atasafirisha Mifugo kwa njia yeyote ile kwa kuingia au kutoka katika eneo la mamlaka ya Halmashauri bila kibali;

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

- (b) atalisha mifugo katika maeneo yasiyoruhusiwa;
- (c) Ataharibu kwa makusudi, au kushindwa kuhifadhi vyanzo vya maji;
- (d) Ataweka sumu au kitu chochote chenye sumu ambacho kwa namna yeyote kinaathiri maisha ya binadamu au viumbe wengine kwenye chanzo cha Maji;
- (e) atavua samaki kwa sumu;
- (f) atalima, atachimba mchanga, kokoto, madini yoyote ya ujenzi au kitu chochote kutoka ardhini katika maeneo yasiyoruhusiwa;
- (g) atalima mazao marefu zaidi ya futi mbili mjini;
- (h) atavuna au atakutwa na mazao ya misitu bila kibali;
- (i) Atasababisha taka ngumu, na kushindwa kuziteketeza kwa kuzichoma moto au kwa njia yeyote ile
- (j) atasababisha moto katika eneo la hifadhi;
- (k) Atachoma mkaa au kukata kuni bila kibali katika eneo la hifadhi;
- (l) Atafyeka nyasi, kung'oa vichaka na kung'oa visiki kwenye eneo lililohifadhiwa bila kibali
- (m) Ataharibu miundombinuya kuzuia mmonyoko kwa kukata miti, kulima,
- (n) Atabadili au kuharibu au kuondoa alama za mipaka ya eneo la hifadhi.
- (o) Atapasua mbao/kukata Miti kwa kutumia msumeno wa mnyororo katika maeneo ya makazi na hifadhi ya msitu.
- (p) atatiririsha maji machafu yanayoleta madhara kwa binadamu na viumbe vingine hai
- (q) ataendesha shughuli za viwanda vidogo, karakana, mashine za kusaga na kukoboa nafaka biila kuzingatia taratibu za mazingira na Mipango miji, au
- (r) atakwenda kinyume na Sheria Ndogo hizi,

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

Atakuwa ametenda kosa na akipatikana na hatia atatozwa faini isiyozidi shilingi laki tatu au kifungo kisichozidi miezi kumi na mbili jela au adhabu zote mbili kwa pamoja yaani faini na kifungo.

G.N.Na178/2000) **26.** Sheria Ndogo za hizi zinafuta Sheria Ndogo za (Hifadhi ya Mazingira, Utunzaji wa Ardhi na hifadhi ya maji) za Halmashauri ya Wilaya ya Rombo za Mwaka 2000

JEDWALI
Chini ya kifungu cha 15 (2)

A. MAENEO YA MILIMA/VILIMA

Na.	Jina la Kata	Maelezo ya Milima
1.	Mamsera	Vilima vya Urubani, Selsoni, Tanya
2.	Mahida	Vilima vya Mahango, Maani na Mawanda
3.	Holili	Mlima Manuo, Lotima, Kakuyuni na Kimangani
4.	Mengwe	Vilima vya Mengwe Chini, Mrembe na Losanga
5.	Manda	Vilima vya Manda Juu, na Manda Chini
6.	Mengeni	Vilima Kasese
7.	Ushiri/Ikuini	Mlima Ushiri
8.	Kisale/Msaranga	Mlima Kisale

B. VYANZO VYA MAJI, VIJITO NA MAKORONGO

Na.	Jina la chanzo	Aina ya chanzo (Chem chem., mfereji Mto)	Mahali Kilipo (Kijiji, Kata Tarafa)
1	Kamdawi	Chemchem	Nanjara Reha
2	Kamwanga	Mto	Tarakea/Motamburu
3	Katotoni	Mto	Nanjara kibaoni
4	Kifunika	Chem chem	Makiidi – Mharo
5	Mshereni	Mto	Makiidi
6	Nana	Chem. chem	Makiidi Maharo
7	Mnyunga	Mto	Ushiri Ikuini
8	Nakikongwe (Kwalakombe)	Mto	Ushiri ikuini
9	Ushiri	Chemchem	Ikuini
10	Imunguni	Chem chem	Ushiri Ikuini - Ushiri
11	Kwamasister	Chem chem	Ushiri ikuini - Ubaa

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

12	Shokoni	Chemchem	Kelamfua/ Mokala
13	Mahaa	Chemchem	Mokala
14	Motale	Chem chem	Kelamfua Mokala
15	Ungwasi	Mto	Mkuu/Mashati
16	Kikelelwa	Mto	Tarakea/Motamburu
17	Kiloriko	Bonde/Mto	Nanjara Reha
18	Kimengelia	Mto	Tarakea/Motamburu
19	Kitaha	Mto	olele
20	Komkoni/Kitoni	Korongo	Kitirima/kingachi
21	Kwavameku	Mto	Katangara Mrere
22	Kyumu (Kiboro)	Chem chem	Shimbi Mashami
23	Lehorama.	Chemchem	Mrao - Keryo
24	lotiro	Mto	Kirongo/samanga
25	Maruwa.	Chemchem	Machame Aleni
26	Marwe	Mto	Katangara
27	Mashima	Korongo	Ubetu/kahe
28	Mashondo	Chemchem	Mengwe Aleni
29	Mlembea	Mto	Usseri
30	Muunga	Chemchem	Shimbi mashariki
31	Mwaheni	Chemchem	Kitasha
32	Nalemuru	Mto	Rongai/Kitendeni
33	Ndetanga	Chemchem	Rongai
34	Ndimila	Chemchem	Mengwe
35	Neskiria	Mto	Tarakea
36	Rume	Mto	Mashati
37	Ruwa	Chemchem	Usseri
38	Shia kitasha	Mto	Mengeni
39	Ushurulu	Chemchem	Kibaoni Tarakea
40	Washi	Mto	Mashati
41	Woka	Chemchem	Kirwa/Keni
42	Mnyua	Chem chem	Kirwa- Keni
43	Kilosanja	Chem chem	Katangara Mrere
44	Chambelele	Chem chem	Katangara Mrere
45	Chilio	Chem chem	Holili
46	Kwa Njofu	Chem chem	Holili
47	Ziwa Chala	Ziwa	Ngoyoni

*Sheria Ndogo za (Hifadhi ya Mazingira) za Halmashauri ya Wilaya ya
Rombo za Mwaka 2014*

Tangazo la Serikali Na. 372 (linaendelea)

*Lakiri ya
Halmashauri*

Lakiri ya Halmashauri ya Wilaya ya Rombo imetiwa katika Sheria Ndogo hizi, katika kikao chake cha Baraza la madiwani kilichoketi leo tarehe.....mwezi,,,,,,,,,,,,,,,,,,,,mwaka 2014 mbele ya wafuatao:-

.....
Judathadeus J. Mboya
**MKURUGENZI MTENDAJI
HALMASHAURI YA WILAYA
ROMBO.**

.....
Mhe. Antony J. Tesha
**MWENYEKITI
HALMASHAURI YA WILAYA
ROMBO.**

NAKUBALI.

.....
Mhe. Mizengo P. Pinda (MB)
WAZIRI MKUU.

DODOMA
30 Juni, 2014